



GINGTU HINKHUA

(Bible : Luka 9:62).

Kochuam hin a ki-upkhumna sung bep hih huaplo in, ziakhel lam ah chun le ahuap lian ma ma hi. Kochuam sun-ga kivaipuakna lamte, thawlawm thute leh Biakna thute bep leh missionary chawp lam bep hih huap pua, Kochuam pawlam ah gingtute hinkhua zosia le a huap ahi. A pawimawpen chu Kochuam ah gingtute hinkhua hi ahi. Gingtute'n mimal hinkhua I mat danteu ahin Pathian leh Kochuam dawidan ahina em, ti hi I ngaitua zing a pawimaw hi. Gingu hinkhua a chun nek leh dawn thute, kichei dante leh nisin ah nek leh chak hawlna ah I sepdanteu ah thiangthona a pawimaw ahi. Zia chu Pathian thu tawh le kituak pen hiding ahi.

Pathian hi a thiangtho ah, a Kochuamte ngei hile thiangtho dingin a daw i, Thuthunglui hun lai apat in thiangthona hi a gen nasa ma ma hi. Thuthungthak hun inle gingu hinkhua ah taksa thiangthona bep hilo in lungthim ah le thiangtho taka gingu hinkhua mang dinga gingtute a daw i thu I mu'u ahi. Zia-ziakachun, gingtute'n I mimal hinkhua'u ah a thiang leh thianglo I khendan ua hin Bible tawh kituaka hinkhua I mat uh chun I gingu hinkhua chu masawn jel ding ahi. Chun, Khrista'n ei dawinate chu supingtu hiding I hiu.

Gingu hinkhua thiangtho taka I mattheina dingun tamlo cha vak en suk hitiu:

Mimal kipiakdawna:

Bible ah chanchinpha Bu ahin Lal Jesu'n vangam lut theina ding dan chuam chuam a gente I mu. Van gam lut theina ding chu Thagau lam thil ahi lai in mimal hinna lampang in, gingu hinkhua ah bawlding agen a um hi. Jesu Khrista hukdamtu dinga pawmlo leh piangthaklote chu Kochuam ah chun minkhum maleu Kochuam ah gingu member suan um leh muan um chu a hi ngai ngai puau.

Gingu hinkhua dikta-

ka mat ahi theina dinga chun kochuam ah min khumna mai kha ahipua, titakzet ah kipaiakna kha ahizaw'i. Gingtu tamtakte'n zialaitak hih ahi I buaina pen chu! A thu ah genthiam mai leh Biakin sung ah valim leh lam mai ahin I lungawi zotau a, Biakin pawlam ah I hinkhaw matdan uh buaipekham leh ngaitua zui ngai ma ma ki um thei ahi.

Nek leh dawn ah thiangthona:

Bible in nek papna leh zu duna, zia khawvel damsung ngaituanate ah kisubuaile ding leh zia mite chun Pathian gam luale ding ahidan uh ei hil a (Lk.21:34. I Kor. 6:10). Gingtute'n le Zu leh damdawi khamtheite, chep leh muamte leh, I taksa sukhawlo theite laka kisum ding ahidan I het-sau ahi. Ahiziakin, gingtute'n zia thu hi I ngaisaklo pen uh a bang hi. I taksa hi Pathian In ahia, khamthei thil ah I sukhawlo chun Pathian In ei sukhawlo ding ahidan Bible ah I mu'u ahi (IKor.3:16). Gingtute'n thiangthona hinkhua hi I ngaitua thak dinga thilpha tak chu ahi.

Gingtute kicheina lam ah:

Kicheina lam ahin a hun bepcha hiat hi thil phatak ahi. Eima tawh kiphutawk a thiangtho leh feltaka kichei ding ahi. Chapo tak leh sual ah ei puikawi thei ding lam ahem ah kichei ding ahi puai. Eima ut dan dan ah kicheina hin I Kochuam chanpite a ding tiang ale zachat umtak ahisek hi. Biakin sunga kichei dan hiat angai a, zia gual ah chun a hun leh mun tawh kituaka kicheina hi hiatthiam a pawimaw hi. Bible inle gingtute kicheina ding thu ei gen hi (I Tim.2:10. I Pet. 5:3:2).

Nasepna lam ah:

Gingtute'n eima nasepna chiata ginum tak leh taimatak a I sep chiat ding uh ahi. Bible in kithadana hi a dem ahi. Government ah nasemtu I hem, ahiloleh khut nasep a nek hawl hiziang leu hin le ginum taka I sepding uh chu gingtute hiding him chu ahi. Kochuam mi diktak chu a thabei ding ahi puai. A mawpuaknate chu kitup tak leh fel taka a sep ding ahi. Sepna hih I nek hawl na le ahin, kitup tak leh feltaka I sep ding him ahi. Nek hawl na zia-ka sepna chu a zachat um ah

ngailo ding ahi. I sepna ah chu Pathian lau kawm ah I sepzawk ding ahi.

Gentheipi ngam a ngai hi:

Khristiante hi bangkim ah Pathian thu tawh kituak taka hing ding in Bible in ei dawite chu I hiu. *“La um dan tawh Khrista chanchinpha chu kituak hen”*(Phil.1:17) ti ahi. Hinkhua ah chanchinpha tawh kituaka hinna dingin a man piak a ngai a, zia dinga chun kinneppite I hiu hi..Ahiziakin, tulai in chanchinpha zia-ka gentheina chu ngawlhuai leh bangmalo in I ngaitua tau a, eimau damsung nawpsakna ding zawkte I buaipei’u a, chanchinpha thu chu I ngaitua nuam ta puau.

Hinkhua ah nawpsakna ding ahi phawt chun nekgukna, gawlgukna leh chanchinpha tawh kituaklo bawl chu khawksak in I nei puau. A langkhat lama zia gual bawl mite chu Kochuam ah kipezo mi leh thawlawm piakna lam in le a tawmngai ma ma sek ui. Ahiziakin, Khristian hinkhua a dingin zia gual chia dante chu dikzolo leh gingtu hinkhua thi-angtho hilo ding ahi. Pathian a dinga kipiaklo ding lam chu

I genna ahipua, chanchinpha tawh kituak in kalsuanzaw’i tiu tichu I gennawp ahi.

Gitlona do ding ahi:

Tulai Kochuam sunga I mimaltin hindanteu chu at-amzaw I kihet chian chiat uh gingchak a um hi. Ahiziakin, kuama a kigentua nuam leh kihiltua nuam a ki-um tapuai. Zia dinmun ahin Paul in Galatia mite kianga *“hepina’n na kiseptua piak chiat un”*(5:13) leh *“nangma la ki hepi gual in la vente la hepi ding ahi”* (5:14) ati thu hi gingtute’n nuizat um ah ngai I bangjo tau. Kochuam ah chun gingtu hawitak guala kilang, himaleh gitlona bawltu hizing, ahiziaka a gitlona chu a dotu ale pang zing tho I hisek ui. Gingtute’n gitlona chu hangsan takmai ah I do ngam ding uh ahi. Zia gual ah pang ngamte chu ahi ging hinkhua mangdikte chu.

Awleh! I Khristian hinkhua’u hi diklona chuam chuam in ala mang kha maleu hin pangthak lakit in, khangthakte’n ei ettawn uh lamdik ahung zui theina ding un panthak lakit hitiu.

.....xXx.....

Nute Ni (Mother's Day)

Nute Hepina leh Chawihawina

(Bible: Thupilte 31:10-30; Matt.23:37)

~Rev, S.T.Kaia Vaiphei

Thumapui:

Amasapen in nute hi mang thei ding ah hun pha damna ei petu Pathian chu lopina leh chawihawina chang ta hen la, nute ni mang ah hung kikhawmte zosia Lalpa Jesu min in chibai ka hun buk la hui. Mi zosia hin pianna nu a nei chiat a, nu'n a thisan leh lemchanlona zia ah a etkawl lo mi khenkhat um maleh khawvel ah kilungsiatna lak lak in nu'n a cha a lungsiatna sang ah lian zaw lungsiatna dang a um puai. Nute ni hi insung ah nute zana leh chawihawina kimang ahi.

Nute Ni Hung kipat Dan:

Khawvel ah mun tamtak in nute ni hi nikhua chuam chuam in March leh May thasang in a la kimang sek hi. United States of America in Nute ni hi kum zabi 20-na kipat til in a la mang pan ta, zia chu mothering church, mothering Sunday tawh a kisai puai. Gam khenkhat a chun nute ni matna chu zia gual tradition chu tawh a la kisamkai hi.

Nute ni hi holiday ah kum 1908 in a kimang pan ahi.

Anna Jarvis in a nu hiazingna chu St. Andrew Church, Graf-

ton, West Virginia in a mang pan hi. Anna Jarvis hin Nute ni matna ding in USA ah campaign a la bawl pan a, zia chu a nu Ann Reeves Jarvis thi kum ahi. A nu hi America Civil War (tual gal) lai ah sepia liante kaitua sek ahi. Ann Reeves Jarvis hin nute lak in damtheina tawh kisai in taksa etkawl ding dan a la gen sek hi. Anna Jarvis hin a nu zana etsakna ding in a nu nasep chu sun zawm in nikhat hi nute zana leh chawihawina ni ding bik ah mat a nuam a, a zia chu mi dang zosia sang ah nute chu hepi pen

leh thil bawl piak tampen ahiu ti ahe ahi.

Kum 1908 in US Congress in ‘Nute Ni’ nit/chan ding ah Anna Jarvis in a guanggalna chu a pawm piak pua, Nute ni mat ahi chun ‘Mother in law’ ni le mat ngai ding ahi, ti’n tawtnan a lak piak ui. Maleh Anna Jarvis hapanna zal in kum 1911 in US parliament chun holiday in a hun pawm piak tai. Anna Jarvis umna kochuam Grafton, West Virginia ah chun nute ni hi kum 1910 in a kimang masapen ahi. Kum 1914 in US president Woodrow Wilson in nute ni matna ding in May tha ah Pathian ni niveina hi ding in suai kai in a puang dawk ta ahi. Tuhin khawvel pumpi ah nute ni hi mat a hung hi tai.

Nute Ni Mat Dan:

Anna Jarvis in nute ni matna ding a buaipi chu a lawting ta, maleh zia nute ni chun Mothers’ Day Card leh thil dang dang ah sumdawanna mat a hung hi chu a lungthim natpi hi. Tulai hin nute ni hin nute kiang ah thilpiak piakna; an nekkhawmpina nute tawh

hun matkhawmna; nute ding ah pauchapna leh nute kiang ah kipak thugennan a tangpi in mat ahi sek hi. Nute ni hi nute mawpuakna genna ding leh awimawna ding ni ahi pua, nute pachakna ni; chawihawina ni; nute mantam dan genna ding leh zana etsakna ding ni ahi zawi.

Nu Mantam Dan:

Insung limna leh kipaknate, kipaklona leh kekzakna tiang in nu khut in a kinga ahi. Sungkuan boruak siamtu pen le pa sang in nu ahi zaw sek hi. Nu pha leh phalo in khawtang tiang in a khawipha thei sek hi. Thu leh la le nu pha leh phalo chungchang a tam khawp mai hi. Bible ah hin le zia lam chu I nei sau sau ahi. Sungkuan leh mihing etkawlna nu pha a pawimaw a, George Herbert chun, “Nu pha chu ziltitu zakhat tawh kibang ahi” a tii. America President lopi tak Abraham Lincoln in le, “Ka bat hi dit ding hileng, ka nu ka bat hi ditz aw haksa pen in a” a ti ahi. Langkhat lam ah nu phalo in mimal suangkuan leh

khawvel a suksiat nasat thei dan hi gen ding tamtak um kit in a. Gam leh nam, kochuam leh mihing hinkhua siamphat-na na hi insung apat pat a ngai hi. Nepelean in “France gam in a taksap pen chu nu pha ahi” a tii. France gam a chun nu tamtak um ngei in a, maleh nu pha tasam hi ding ahiu. Zia hi I gam khanmawbawh ahi. A langkhat kit in D.L Moody chun “Nu zosia hi ka nu gual hileh khawvel ah hin suangkul siam ngai puan a” a la ti hial ahi.

Nu chu Sungkuan Pawimaw Dawnhuna:

Insung mite zing an nekwah ah eima na chiat sem ding ah I hung kiguanggal tak leh henu, henu ti hi a gi tam sek ma mai. Khenkhat in bang ka ak ding ahem, zia chu, zia kha khawi ah a um em? A ti chiat ua, zia zosia chu nu chun a dawnhu fel vek nung tak leh mani na chiat in I chia thei bep sek ahi. W.M. Thackeray chun, “Naupangte muk ah chun nu min hi Pathian min tuk in a lul ahi” a la ti ahi. Nitum ah

nasem chawldam pawimaw inlam hungten le nu a gen gi masapen kit ui. Zia chu a um em? Zia chu lei la bawl piak em? ti’n nu dawnhu ding dawtna ma I kengkawm kit sek uh ahi. I bible chang taklat gual in nu ting chun insung mite pawimawu a mu sek ui. Nu pha chu insung mite pawimaw dawnhuna hi ding ah a kiguat a ngai hi. Zia gual chu a hilo chun nu chu insung taksapna tuntu ahi thei hi.

Nu chu Insung Mite Kankhawmtu:

Sungkuan pawimaw dawnhuna nu chu sungkuan kan khawm tu phapen ahi kit hi. Pa leh chate, cha leh chate leh pawsal insungmite leh ama insungmite, chate leh lawiteu leh a pawsal lawite leh a seppite, insung ah kankhawmtu phachuam pen chu nu ahi. Rebeka pawsal nei ding chu a suapinuten a sing ah sang tamtak nu hi ding in a thadawh uh ahi. Cha tamtak nei ding ah a dawisaknau thu chu a hi ngei a, zia lo a chun, nu pha chu a chate ding bep hilo in a pawsal

a ding bep hilo in, a pawsal insung mite ding ah nu ting, in hunglut taphawt a ding leh lawi leh pail eh malzinte ding in le tilkhona phatak hi ngei in a. Ziagual tuk ah sungkuan kan khawmtu ding ah paw-imaw chun kan khawm lo ah a khenzak lam ah a phatchuam viau chun sungkuan sukek theitu pen ahi kit hi.

Nu chu Suangkuan Mel kilatna:

Sungkuan ah pa hat-lo leh nep tak le nu pha chun a selkhu thei sek hi. Nu phalo leh lepchia chu pa melkhu zawgual ahi ngia puai. Pa phalo sang in nu phalo hi sungkuan in a thuak zawi ti le hin kigenkhial lo mai thei ahi. Ziaziakchun nu chu midangte kiang ah insung mel kilatna pen ahi ti thei ahi. Mi inn ah khaw-lai I len tak leh ahem, I zin tak leh ahem, pa pen chu thip hiat hiat chun pa chun ei ho lumlet lehle a kimuang thei diak puai. Nu pha chun sungkuan zia phalo lai le liakhu in a phalam in a kilatsak thei a, nu phalo chun sungkuan hawina

zosia le sumangthei khawp in sungkuan a sumualpho thei sek hi.

Nute Hepina:

Bible thiamte chun hepina hi Grik pau in chi thum a um hi atiu a, ziate chu agape, philo leh eros ahi. Zia lak a hin agape lungsiatna hi Pathian in mihingte a lungsiatna ahia, philo ahileh lawi leh pai kilungsiatna ahi, eros ahileh nungak tangval kilungsiatna leh ganhingte kilungsiatna ahi, atiu.

Nu in chate a hepina hi bang a hin bul ding a hem ti ngaitua in nuten chate a hepinau hi agape hepina ahi ti in a gen uh ahi. Nuten chate hi a hepi mau a, paten chate a hepina sang un le gam cheng in a lian zaw ahi. Nuten chate hi a hung pian masang un thasawm a gilpi sung un a hung vawp ua, mihing ah a hung chawm kit ua, a dam lo un zankhua in a hapiu a, a tungtun un kum khat val a hung puau a, a pheii un kum khat val a hung pawm ua, tichun nu hinna leh chate hinna hi a kizawp ahi.

Lungsiatna Na (Pain Love):

Nuten chate nek leh chak; sill eh chen, school kaina ding ngaituana ziak in gim tak in a pang ua, tekpu ahiloleh pawsal in sugenthei ziang leu le chate khankhua ding leh nauchaga a hung hi ding uh ngaai ngam lo in a pang tun tun ua, haksatna gentheina leh natna a chung un a kibel uh ahi. Chate ding khualna ziak in a thawk gimpo ua leh a kipak ua, ziaziakchun nuten chate a hepinau hi sappau a chun pain love (lungsiatna na) a tiu ahi. Nungak leh tangval kilungsiat tak hi le a lungsiatteu ding ah a kisen ua, a gimpo ua leh a lungsiat deu deu ua, a kipak deu deu uh ahi. Zia chu lungsiatna na chu ahi.

A tawpna ding in Matt.23:37 ah I mu dungzui un Jesun Jerusalem hung siat ding chu a mu in a lungsiat ma ma ziak in a kaa khum ahi. Zia Jerusalem a lungsiatna chu akpi'n a note a lungsiatna tawh a tekhin ahi. Akpi'n a note a lungsiat dan hiat theina ding a chun ak note lengdawk thei lo

in um ta leh le a note chu a thanuai ah awp khum in tin, mei chun a taksa chu hung kang ziang ta leh le zamdawk diak lo in a thanuai ah a chate awp-khum in thi chil mai ding ahi.

Unaute haw Pathian in ei hepi ziak in a Chapa neisun ei hung pia, nuten ei hepi ziak un gentheina nasatak thuak in a hinnau a mang uh ahi. Tuni hin nuten ei hepina gel dawkw thakkit hi tiu.

Lalpan a thu a thak in malzawl ta hen. Amen.

.....xXx.....

KOCHUAM SUNG AH PATHIAN SUM NEKGUK/CHAKGUKNA (CORRUPTION) HAISAN TAITIU.

~Rev. Dr. Hangpi Manlun
Moderator, Zou Synod

1). A umzia hilchetna.

Awle ithupi uh, 'Corruption' iti phat ua le i lungthim un sum leh pai nekgukna lam mai mai hiding in gingchakna i nei ngal maitheti u'i. Ahin, a umzia diktak chu zia lam bep chu ahi pua, thuneina matkhialnate, midangten a chanding ua kilawm a chanlonate, mani bawlo ding tiang ah vakisaklanate leh diklo taka sum leh pai munate chu "corruption" in a huapthei hi. Chu-leh, Corruption thumal hi eimau pau gual in i mangtau a, ei pau ah ledaw dingin le haksa hial in a umtai. Aziak chu ipi/puteu hun lai a ala thiangtho hiding ahiu in corruption thumal hi ala hamat puau. Ziakachun, ei pau manglo in Sappau ah 'corruption' zawk hi i mangto ngal ding ihu. Bible in le corruption thumal hi 80 veival a chuang a, ziate chu taksa leh thagau susethei leh Lalpa laka diklo taka khawsakna leh a danjui utlou mite genna ahideu pen hi.

2. Bible a Corruption thu imuteu vak ngaitua masa hitiu.

2.i). Adam leh Evi nekgukna thu.

I Bible i et leh Genesis ah Pathianin Adam leh Evite nupa kiang ah 'sia leh pha hetna thing ga kha nelou ding in thu apia'i. Ahin Setan thumang in neklo ding thing ga anektak ziakun, khawvel

ah سوالنا alutta, tuni tiang in ei asuan-leh-pakte hi migilo i hikhawlawt hu imu'u ahi. (Genesis 3). Chuleh Evi leh Adam in neklo ding anektak ziakun, Pathianin 'action' a langal a, Eden huan apat a 'nawmang' ngal mai hi. Nekguk chakgukna hi chu Pathian tawh kikhenna ahidan Adam leh Evite nupan apat hin a muthei hi.

2.2). AKan nekjukna thu.

I Bible, Joshua 7-na ah, Israelte chu Joshua lamkai na'n galjawna nasatak aneito lai un, gingchaktlopi'n Ai khua neu-cha khat chu a dojo ta puai hi. Azaik chu Akan in laklo dinga Pathian in a tite alalak tak zia- in Israelte'n guallelna leh mual-phona nasatakmai a chang ua, mitamtakin le a hinna uha chanlaw tau hi. Akan gitlona hi Pathian in Israel mipite gitlona gual in a simpiak a gal chu a zawlo law tau ahi. Zia thu ah kipat hin mikhat nekjukna chu Insung, chi leh nam, gam leh nam a dinga niam kiakna leh thina tiang tuntu ahidante a muthei ahi.

2.3). Thiampu Eli chate nekjukna.

I Samuel 2-3-ah Thiampu Eli chaten Israelte maicham a kithawina ding sate, thiampute nekdingte akinek zia- un, Pathian alungawi ta pua, a innsung ua Pathian lungnatna tungin a hunlo in athilaw ua, chuleh thiampu ahina le a beilaw tai. Elite inkuan chanchin ah pat hin nekjukna chu taksa leh thagau ah Pathian sapsiat- na leh khanggui tantheina a

hidan i muthei ahi.

2.4). Israelte leng masapen Saul diktatlona.

Zia thu hi 1 Samuel 15- ah imu u'i. Pathian in lengpa Saul chu, Amalek mite do a thatlum vek ding a thu apiaklai in, Saul in thumanglo in laklo ding, belum, bawngchal leh a lengpa'u Agag nasan ahing in ahung kai zia-kin Pathian in a leng hina a kipatin apaimang hi. Laklo ding leh thalup vek ding a Pathian thupiak a zui nawplo zia-kin in Pathian in ataisan atop ah ama-leh-ama akithatlum tai. Nekjukna chu a tawp le eima ngei a ding in le thitheina tuntu a hidan a muthei hi.

2.5). Elisha suak Gehazi nekjukna thu.

2 Lalte 5-ah Sepai sap- lian Naman in aphakna Jawl- nei Elisha thupiak gual ah Jor- dan lui a sagivei kidia a, suk- damna achanna zia-kin in kipak etsakna in Jawlnei Elisha kiang ah thilpiak apiak guaatlai in a ut puai. Ahin, a suak Gehazi in enla in aguk in avanung del a, kapu'n dangka talent khat leh kithenna puansil pani ei pia'n avati tai(chang 22-23).Zia

thu chu Elisha in a hiatphat in hansia alaw tai, “ Namaan phakna chu nang leh la suante chung in um zing inna” atitai.(chang 27). Zia kipat chun nekgukna ziakin a suante tiang chanpha in phak chu a veilaw tau hi.Tunin le nekguk/chakgukna zia in Pathian nasem tampite’n le thagau lam ah phak tamtak i umtau ahi. Zia gawtna chu ei khangmai a beilo a i tukhang tiang ah a pap i puak khak ding alau um ma ma mai hi.

2.6. Juda Iskariot nekgukna thu.

Juda Isakriot in Lalpa Jesu kha zuuak in, Thiampute kiang ah dangka 30-a guk ah kilak in a matsak tamai hi. Ahin, a tawp in a kisik ma ma a, a sum lak kha thiampute kiang in a vanung piakkit gua, ahinla adawi tapuau a, ‘malzin kivuina ding thanmual chawkn’a’n a mangtau ahi’ Juda Iskariot ngei le kikhailum in vanlai zawl in a gilpi a uak kek tai(Nas.1).

Zia ah kipat hin nekgukna chu i neklai in nuam tak gual in kilang maleh i nekguk zaw phat le a nuam diak pua,

negutu a ding in thina tuntu ahita mai hi. Thina tiang hial tung ding ahilam Juda Iskariot hin hie hile zia gual hin ala umlo mai thei ahi.

2.7). Anania leh Saphirate nupan nekgukna thu.

I Bible Nasepte 5- ah, Anania leh Saphirate nupan in a gam neisa khat uh azuak ua, akim khatman chu a ipmang tak zia kun Pathian them suakin nikhat thu in a hinna uh a chanlaw tau ahi. Zia thu hi nekgukna lam hichetlo in sawm ah khat a piaklo zia kun uh ahizaw ahi. Ahileh, Anania leh Saphira te nupan in sum a ipmang uh chu kua a changta diam? Eium le Pathian laulo hial a i nekguk/chakguknate tawh i goman tamtakte chu dan leh thisanmai ding ihi ban ua, chuleh rapture zaw a dingah gokhawl khawm bep i hikha mai diam uh maw?

2.8)I Lalpa Jesu than ah kipata thawkit nungah gawlgukna thu.

Matthai 28:11-15, sung ah Jesu’n thina zo ah than ah kipat a thawkit lai in sepaite kiang ah thiampu liante avachiau a Jesu a thawkit hilo in

sepaite ihmut kalin anung-zuiten aluang kha agukmang ahi atina ding un sum tamtak apiau a, tuni tiang in zia thu hi Judate lak in a kigen nalai hi. (chang 5).A chung ah igenteu nekgukna hinkhua alamangte chu kuama nuamsa leh kipak a umlo uh ahi.

2.9). I Bible gendan in sawm-a-khat piaklo le nekgukna ahi.

Pathian malzawlna i chan dungzui un sawm ah khat piaklo chu nekgukna chikhat ahi. Pathian in Malaki bung 3na ah, “Sawm ah khat kei a ahi atia, piaklo chu Pathian gukna ahi ati ahi”. Chuleh Lalpa Jesu inle khawvel ah a lenlai in, “Kaisar thil chu Kaisar piau inla.....Pathian thil chu Pathian piau in..” ati ahi. Ziakachun Pathian in a sachan ding ah a gen sawm ah khat chu diktak ah piaklona chu nekgukna chi khat leh Pathian suamna chikhat ahi thu I Bible un chi-angtak in imuthei uh ahi.

3). Pathian Kochuam sung ah nekgukna (Corruption) thu.

Pathian malzawlna ziaakin kochuamte le khangto

in malam isawnto tau a, i bud-get-teu le crore 2/3val bang ahi theitai. Ahin, i simmawna leh nuaisiana uh hikeilo in, a bul hawitaka isut uh chun i thaw-lawm sum munateu haw tangpi chu miginumte tuak khawmte ah kipat ahiu a, ziate chu aktui mante, meihawl mante rickshaw hekte nikhawtha, nisin ah kilawkawmte knikhawtha, meithai chagate leh mi'n a nek sik sik nuh a hung chaw-ikhawmteu leh adang dangte ah pat ahideu tangpi hi.

Chuleh, i gensa gual un Solkar nasaemte gentaklo, kochuam ah puitute lak ziang in le nekguk/ chakgukna a bei diak puai. Chun, sum leh pai saikhatute'n le sum leh pai chu isaikhak nak ua le nekthei le nekding mai ah i etsek uh hile thilda um tak ahi.

Pathian in sawm-a-khat pelote bawn gucha eiti le migenthei/liangvaite piaksa suthelthang ah negu ngamte chu Pathian ngai in migilo chungchuang leh huaisia ma ma hiding ahi.Amau ziaakin, ginna a naupangte'n thilpiak lam ah thatdana ahung neilaw thei ua, ziagual mite gawtna

ding chu Bible in,ble in, “Angawng ua bu-gawi zanna suong gihpi khat awhsah a, tui lithuh-pi sung a khieh ding” tia a gente kha a sachan ding uh hileh a kilawm mai hi. Zia bana chun, Pathian in, “Kei, Lalpa la Pathian uh hi khangni khangthum tiang ah phuba la theitu Pathian ka hi” a ti ahin, ei lawi nek-guk/chakgukna ziaka itu/icha bangma heholte chung a Pathian gawtna tungthei ahidan hetmillo ding ahi.

4). Pathian sum la negukna midangte themzo malechin Pathian vang themzo puanla.

Tulai khawvel hi a chalaklak, a bawl ngam ngam leh migilo, a pil khelte adingin hunchawm khat sung chettheina gam asuakta ahi. Pathian sum-leh-paite le a negu nuam leh negu ngamte a ding vang ah nektheina ding lampi-um ma ma ding ahi. Ahinla, zia chun vang sawt dailoding ahi. Chuleh, auditorte i themzo maithei a, ahin Pathian leh eima kithemzolo ding ihi. A umzia chu mihingte themzo malechin Pathian leh eima ngei hi kithemzolo ding ihi tina ahji. A chawmkim in gen-

leu hin Pathian sum ah van tamtak chaw ah cha leh naute chawmte le kuama a gitung a um ngai puau. Khang kihilna pha ahi. Ziaziakachun, Pathian sum i nek-guk leh i kituakpi ding chu sum neipa Pathian ahimai hi.

5). Thusitna/tawpna.

I gensa gual un nek-gukna chu Pathian pawikhawina ahia, nikhat ni leh Pathian vaihawmna masang ah i dingpi chiat ding uh ahi. Ei Khristian Pathian hing bête'n ziagual ah thildiklo leh sual chu i do ding uh ahi.

A chung ahigenteu hi kuama mimal demna leh gena ahi pua, a sukha zosian kei ei genna ahi ti'n la thei chiat leuhin hawi ma ma ding ahi.

Lalpa'n simtu zosia ei malzawlta hen aw. **Amen!!!**

.....xXx.....

PAUCHAPNA THILHITHEINA

(The power of prayer)

(Bible text: I Sam.1:10 -18).

~Evan.T.L.Mang Vaiphei

Thumasa:

Gingtute'n pauchapna'n thil thupi tak a sem thei hi ti i he chiat ua, zia taksanna chu tawh nasa tak in i pauchap uh a hi. Zia pauchapna thil hitheina chu a mawk ah tung ziang thei a hi pua, ama'n piak a ngai a hi. Pauchapna thilhitheina i taksan dungzui un, ei un le, an-nngawl pauchapna bang, jan khawvak pauchapna bang bawl in theitawpsua in i gam leh nam, i kochuam leh khawtang, i insung leh mimal damna ding in i pauchap sek uh a hi. Himaleh, pauchap i ha bawl gual tuk un, bible sim ah Pathian thu sut leh ngaitua i tam kit lo uh a hi. Pauchapna i ngaikhawk gual ma un, Pathian thu sim in i sut ding uh a hi. Pauchapna ding ah thil pawimaw ma ma te i Bible changtel nau a kipat in zillai vak en hitiu.

1. Thagau ah lunggil puakkek pum in i pauchap ding uh a hi.

Hanna pauchapna hi musit um tak himaleh, ama hi lunggil puakkek pum ah mitthi luang in a pauchap a hi. **_mitthi hin, puakgik_** a etsak a hi. Lunggil ah puakgik nei pum ah mitthi luang ah pauchapna chun thilhitheina thupi tak a tun sek a hi. Pauchap ding a hi ziak ah pauchapna mai mia a chun gasuana a um ngai

puai. Bawl ding a hi ziak hilo a, lunggil ah puakgik nei pum in Lalpa kengbul in i pauchap ding uh a hi.

2. Ginna tawh i pauchap ding uh a hi

Tulai gingtute lak ah da-um ma ma chu, Pathian thilhitheina hezing ngal, a thilhitheina taksang lo, pauchap zing ngal, lawting ding ah kinepna nei lo hi a hi. **_La gin chun Pathian lopi zia mun la_** ti hezing ngal a, Pathian

lopina mu kinepna nei lo a pauchapna chu lawsapna a hi. Hanna in ginna thupi tak tawh a pauchap a, a pauchapna chu Lalpa'n a hiat piak a, a lawting a hi. Lalpa lawtin tak ding in ginna nei in i pauchap ding uh a hi. Charles Finny chun, _ **Ginna duktak nei ah pauchap theina ding in, Pathian tawh nisin kitawn khawm zing a ngai hi,**_ a ti hi nial gual lo thudik a hi.

3. Pauchapna hi lawting ding ah kihaksialna nei khawp in i pauchap ding a hi.

Hanna pauchapna hi lawting ngei ding ah Pathian ang ah kihaksialna nei hial in a pang a, zia dungzui ah chun a lawting him a hi. John Knox chu, _**a lawite tawh anngawl in ni sagi Scotland ah halthakna tunna ding in kihaksial hial in a pauchap uh a hi.**_

Tulai gingu tam tak te pauchapna hi, Routine work (bawl dan pangai) ah pauchapna mai a bang zo tai. Lawtin le khawksa bek lo, lawtin leh la kipak um ti dan ah bawl lo

theilo gual ah ngai ah bawl mai i hi zo tau.

4. Eimau a ding hi lo in, Pathian lopina ding in i pauchap ding uh a him.

Gingtute pauchapna hi manimasial pauchapna hilo a, Pathian lopina ding ah pauchapna a hi ngei ngei ding a hi. Tulai gingtute pauchapna hi, eimau thupina ding, hauna ding, pilna ding, lopina ding a hia, Pathian a ding ah mun i piak sek lo ziak un, i pauchapna teu hi lawsapna'n ei zui zaw a hi. Studdert Kennedy, _**Pauchapna hi i thil dawi neina ding hilo in, Pathian dawi dan neina ding ah pauchapna a hi jawi,**_ a ti hi a dik a hi.

5. Thawk-zawna nei pum in i pauchap ding uh a hi.

Pathian lemguatna hi mihing kuama'n i he puau. Pauchapna him him hi a hun ah lawtinna i mu ngal teu a um a, chawm khat zaw leh lawtinna i mu ding bang, thuak zo tak ah dawt ham hamna leh gunchuna ziak ah i mu ding bang a um a hi. Thawk-zawna

panglo a lawtinna a um puai ti hia in, thawk-zawna tawh i pang ding uh a hi. St. Augustine chun, **_Thawk-hatna tawh mitthi luang pum ah pauchapna hin thu tampi gen sang in na a sem thei jawi,_** a ti hial a hi kha!

6. Lungthim diktak pu'n i pauchap ding uh a hi.

Lungthim ngaituana dik lo pum ah pauchapna chun lawtinna a um ngai lo ding a hi. Lang nei sik nei, ngaidam lo nei pum ah pauchapna kiti him him hi Lalpa a ding ah dawnhu tak pauchapna a ting ngai lo a hi. Tulai gingu hinkhua da-um ma ma chu, **_Pathian tawh eimau mimal kikal dik sa ma ma, midang te tawh kikal dik thei him him lo gingu nun hin, i Khristian hinkhuau a sumelsia a hi._** Hanna gual in lungput diktak nei pum in i pauchap ding uh a hi. Ziaziak-achun, i pauchapnau le a dik theilo a hi.

7. Kingainiam tak in i pauchap ding uh a hi.

Hanna chu kingaitawm

tak in a pauchap a hi. Chapona chu lawtinna ding ah melma a hi ti hemil lo in, Pathian ma ah kingaitawm tak in i pauchap ding uh a hi. Tulai gingu hinkhua ah i lawsap sekнау chu chapona a hi. Thagau mi hina ah chapona, thugen thiam hina ah chapona, theillogical degree sang nei ziaak ah chapona, an-ngawl pauchapna chia tam ziaak ah chapona leh a dang dang te ziaak in i lawting thei ngai lo uh a hi. E.M. Bounds chun, **_Tulai koch-uam in a pawimaw pen chu matchak hawi leh khantona a hi pua, kingaitawm tak ah pauchap mi a hi jawi,_**a ti a hi.

8. An-ngawl pum ah pauchapna.

Hanna numei tawm tak mai chu a mipite leh Pathian lopina ding in an-ngawl in a pauchap a hi. Het ding ah pawimaw chu,

Pauchapna in thilhitheina a um pua, thilhitheina chu Jesu ah um a hi.

_An-ngawl na hin thilhitheina a um pua, thilhitheina chu

Jesu ah um a hi._
 _Jan khawvak pauchapna hin
 thilhitheina a um pua, thil-
 hitheina chu Jesu ah um a hi._
 _Jan khawvak leh an-ngawl-
 na pauchapna chu Jesu thil-
 hitheina a hung kilatna ding
 ah matchak dawi-um tak te
 chu a hi._
Thutawp:

Pauchap dik tak ah ki-
 pat in Pathian in a thilhitheina
 thupi tak a taklang sek him a,
 himaleh, pauchapna ah thil-
 hitheina thupi tak um ah ngai

in, a thilhitheina neitu Jesu he-
 mil hial khawp in i pauchap sek
 uh a bang hi. Lalpa pawmtak
 pauchap dik eimau hinkhua
 a hung gasua theina ding in,
 pauchapna a kipat Pathian
 thilhitheina kilat theina ding
 ah pawimaw thu pagiat i gen
 teu a kipat in, i pauchap dan
 uh sudanglam ding leh eimau
 lam ah sukdik ngai umte sukdik
 ding in kisa chiat hitiu.

.....xXx.....

**MUNTIN LEH GAMTIN IN (INSUNG ZOSIA)
 PATHIAN NASEM AH GIN UM PEN IN.
 (Heb 3:1-6)**

~ Rev. Seilunlal Vaiphei

Amasan, tuni tiang ah Damna Aw Article ziaik thei ding
 leh ngaituana nei thei nalai dinga damna ei pia hat chungnung
 lopina I pe masau hi. A chung a I taklat gual un, mihingte hi I
 mawpuak nau leh I sepnau in ginum tak leh titak takna neitalo
 in mani dawi dan dan in nate I sem zo tau hi. Sep ding ei pepa
 chun bang gual in sep ding ei pia, ei man bang gual in I sem em?
 Zia thil zosia hi hemil in I pu doi gual hi ta lo in ei ma ti dan leh
 pha ti dan in I la chia khak sek ziaka hin I pu le chawihawi na le
 chang ta lo in, a semtu eima ngei le chawihoi in ki um talo ahi.

1. Sawlchak:

Sawlchak thumal hi Greek pau a “apostles” ahia, English pau in “apostle” ahi. New Testament sung ahin Jesu Khrista chung a “Sawlchak” ti thumal kimatna zia chau hi ahi ti’n mithiamte’n ala sui daw dan uh chu ahi. Chun, sawlchak thumal a pat hiatdaw thei khat chu mihing kua hem khat chu thuneina pum ah ki sawl chu ahi. Chun, John 20:21 “Pan kei ei sawl gual in keiman le nang uh ka hun sawl la hiu.” ati.

Ziaziakchun, Khristian nang leh kei ei sawlna ahin thunei ding leh ama doi dan I hiatte vahil vel dinga ei ki sawlna hin, ginum leh mite nek thei ding in I um nam?. Sawl ah um I hi chun ei sawl pa ngei chu nasem ah achia leh a vak vel pa sang ah chun a len zaw leh lopi zaw ahi ti chu hiat chian ngai ahi. Bang gual in thiam in pil leh le a sawltu lunglam bawlo ahi khak chun a sawlpa ngei chun, a sep a bawl na zosia a pan mun a lip thak piak ding ahi.

2. Nasep:

Nasep hi mihingte a

dinga thil pawimaw pente laka pakhat ahi. Bible ah I la mu gual un “Sem nuam lo chun nek le ne ki hen” ti ahi gual in, in chen lo chen siam tupna ding in ti tak tak na nei a pan la nasemte ngei chu mi lawting ahung hi sek uh ahi.

Sepna mu ta ngal ah, thil dang tawh ngaitua zing kawm ah, a min mai mai ah sem leh bawl kiti hi eima chung gikna leh lunggimna ei tutu in ahung pangsek hi.

3. Ginum:

Khawvel ahin chanu leh chapa ginum hi a ki vang ma ma ziang hi. A diakin Khristian sung kuan ahin a khawk diak a bang hi. Bible in ei hil gual in ei hil gual in, Khrista hi a pa a ding in a Ginum a, a pa’n a sawlna bang in thu nein ate, thil hitheinate a pia, zia dungzui a chun, aman le A pa doi gual leh thu tep gual ngei in khawvel in ahung a, ginum tak in haksat na lamppi te thuak in, soisakna tampite tuak in ala um a, zawna a chang bep hi.

Tuni hin, nang le kei in le ei sawlpa doi gual semlo a ginum lo taka hinkhua I mat zing ahi

chun bang hem I law chak pi ding. Gentheina, haksatna, soisakna, du-amna thil te I thuak zaw lo ahi chun, bang gual in mihing te mai in thiam chang le hin le Pathian ma thiam lo I chan tho tho ding ahi.”

4. Kipakna:

Kipakna chung ahin gen di atam ah, himaleh zia taka kipakna I vak gen uh hi, mimal kipakna lam hi zaw lo in ei sawlpa kipakna lam zawk gen ding I hiu. Gingtu I hi nau hawi taka I ngaitua ahi chun, khawvel ah I khawsak nau ahin, ei ma lopina ding him him chu um lo in, bangkim I sep I bawl zosia hi gitlo I la hilai ua, ei hepi a a thisan ah hung sil thiang pa daw gual sem a ama lunglam bawl ding leh a kipakna lam ngaitua ding hi I maw puak nau ala hi zw dan ahi.

Mihingten ei ma daw dan maimai leh eimau ti dan maimai ah sem leh bawl ding hi lo in, I sika hung thipa daw-igual ah mun haksa na a te, gentheina mun ate, mi chia nuamlona mun ate, chun mi sep nawplote siam ah ginum tak leh nunnem taka hing ding leh

dikna lampi mi dangte kaw mutu hi ding lam hi Pathian Kipakna lam chu ala hi zaw hi.

5. Thukhakna:

Khrista nungzuitu khat I hi chun I hiatmil lo ding khat chu Mosia khang ah na kistem leh thil kibawl zosia kha chu a lîm(shadow) ahina, a tak chu Khrista ahi. Mosi kha zan ah thapi (Moon) gual ahia, Sun nisa (Sun) ahung vak phat leh tha (moon) a mang/bei gual ahi. Thapi in ama cham in vak anei pua, nisa vak apat in ahung vak daw k ahi.

Zia gual chun, mihingte hin thil bawltheina I nei pua a, bangkim hi Pathian a pat hung pawt a, zia kipat chun mihingte hin thil sem leh bawl daw k thei pan I hiu.

.....xXx.....

Thagau Thiangtho leh A nasep

~Pu. K.L.Muana Khaute

Kum tamtak liamta apat Thagau Thiangtho nasep Khristiante lakin a hung tungtamta ma ma a. Ahinla, sepga haw-itak muding tamlo in ka hiai. Thagau Thiangtho hi Pathian mizia pathumte lak ah a tak ah hiatlo pen, gingtute'n a ngainatpen hleh a kilawm hi. Zia thu hi tuchung lekha kizik ahin le genkim zopua'u hitin, kuama'n le gen bukim thei ding in ka gel puai. Zia apat hin eima'n thagau i chan dante leh midangte dawn dan I hiat leh I mu apat in a pawimaw zia I hiat leh I mu thei uh ka kinem hi. Hiatsenlo leh hia bukimlo zolo I hi ziak un, pilvang taka gen leh zui ding ahi. Khawvel thil dangte gual ah hiat bukim theilo ahi zia kin thagau zosia hi pawm mai hi dik khel puana.

Bible a thagau thiangtho a latdan tangpi

I Bible thiangtho a i mu gual un, a mizia sangin a nasep a lang zaw hi. Thuthunglui (OT) et chun Hebrai pau ah Ruah, a thi/hui tite, thagau amang sek ui. Jehovah Ruah, Lalpa hat ti Isai 3:7 hung 9:17 Greek pau ah Pneuma tawh thumun ahi. Johan 3:5-8 i et chun thagau hile thigua/hui ti le a um gelgel hi.

1. Thuthung lui ah a latdan:

Lalpa thagau ti'n amang ah thagau chu hinna bul, hinna petu gual ah genna a tam hi. Genesis 1:2, 7:5 Psalm 33:6,

Psalm 104:29, Psalm 145:4, Job 12:11-13; 14:11. Ezekiel 37:7-10 chu leh hattak leh thilbawh thei tak mai mite thuum ah hatna piatu ahi thu mu ahi. Genesis 4:38, Numbers 27:18, Romans 3:10,13:25, 1Samuel 11:6, Ezekiel 3:14.

2. Thuthung thak ah:

A thagau thiangtho ziltitna chu muntam tak ah mu ahi. Gal. 5:1-25, thagau thiangtho chun mi tamtakte a piangsak in gingtute thagau in nasa takin a chawm in a chenchil sek hi. Lalgam nasep na di'n hatna piatu, hansanna, thil hitheina leh kochuamte ahi

thiangtho a kipum khatna a siam sek hi. John 3:6, 1Timothy 1:14, Rom 8:14, Acts 4:8,11,24, Ephesa 1:13 Lalpa Jesu ngei khale Pathian Lalgam na a sep apat a thi, a thawkit tiang ah khan a thagau thiangtho in na a sem ah a umpi zing ahi. Matthai 1:18

Thuthungthak a chun, thagau thiangtho in gingtute a umpi zing hi. Rom 8:9,14-16, 1Timothy 1:14 zia thuthungthak ziltilna bulpi pakhat ahi. Jesu kross a khai kan na'u phum ahin, nithum ni in a thawkit nungin zilsakna chung ah hungtung in kochuam ahung kiphu pan ta ahi. Tichun, thagau thiangtho in kochuam a la umpi ah tichun i la khangto zel ta'u ahi.

Thagau thiangtho nasep pawimaw khenkhatte:

I Bible in kochuam chanchin chiazal ah thagau thiangtho nasep chi chuamchuam mu ahi. A masapen in thagau thiangtho chu Pathian tak ahi zia hiatna leh pawmna kichian tak apat in a nasep hiatchet thei in a tepte ahi.

1. Thagau thiangtho hi pi-anthak saktu ahi:

Thugin chun thagau thiangtho chu migilo i hi zia uh leh i chung uh a gik zia ei hilsek a, Nicience thugin chun, thagau thiangtho hi Lalpa hinna piatu chu a pawm ah Jesu ginglo chu gilo leh dan bawtsiapa ahi, a time. Ephesa 2:1 gingtu chu thagau ah piangthak ahin, piangthak chun Pathian thagau a nei hi tin a hi(Rom 8:9). Mi khenkhat ten thagau Baptisma ti thumal a mang ui. 1Cor 12:13, Acts 1:5 zia hi le thagau ah pianthakna a genna tho ahi. Thagau ah piangthak chu siamthak kiti na a hi. Tita 3:5, Gal.6:15 zia kampau ahin pianthakna chu thagau thiangtho nasep liau liau ahi thei ah, mihing chanvo a pan zia a gen lang hi. Rom 16:5, 1Cor.16:15, 1Tim 3:5.

2. Thagau thiangtho chu suthiangthotu ahi

Gingtute hinkhua ah thiangtho na hi, mi ahung piangthak phat leh a kipan bep hi. 2Thesolonite 2:13, 1Peter 1:2, thagau thiangtho chun gingtute sukthiangtho dan chini a um a khawvel leh a vaihawmna hungtung ding ah pat kawi chuam ahi.

Gingtu hinkhua ah thil hung kipan chu masawn na ding lampi ngaitua piak, suk-pitin zel a ngai hi. Khristian hinkhua ah i buai nau tam tak hile zia thu hi i hiat fel zawlo zia uh ahi. Gingtu chu thagau lam thil, engine thuaknei gual in robot dawina leh lungthim mat ahi. I thinlung ah thagau nasep na hi phal zing ah pan lak thei zel chu thianthonna lampi ahi.

Paula'n thagau leh tak-sa dan ah a kituaklo dan ahi chian ah, Rom 3:12 bat i nei ui ati hile thagau zal ah thiangthona nun i nei ngeingei di'u leh bat gual ah i pawimaw uh tina ahi. Thepna hi pelthei ahi lo zia kin thagau zal ah dawina leh hatna thak mi a nei chun, zotu hinna a changsek hi.

3. Thagau thiango chu pumkhat ah ei siamtu ahi.

A pawimaw chu gingtute pumkhatna hi ahi. Ephesa 4:1-6, 1Cor 1-13, John 17:20-23 zia hi Lalpa Jesu'n a ngai pawimaw ahi. Thuthungthak a chun gingtute chu khrista suangphu a taksa ihu. Ephesa 2:21-23, Col 1:18 thagau thiango chun taksa bungkhai

chi chuam chuam chu lawm khat in a siamkhawm ah nihit thiamna leh sepkhawm theina pha a siam ta ahi. Thagau thiango thilpiak chuam chuam i dawn teu hi, pawlam lam hinkhua cheimawitu di leh suk hausakna ding ei piak ahi. Ahinla, kituaklona tuttu ahi sek ah thagau in a sep diklo hilo in a changtute mani masialna zia ahi.

Kipumkhatna hi gingtute piak thei hilo maleh, a kawltup ding ah ngansia i hiu. Thagau thiango in bangkim hithei maleh a chenna leh matchakte i pilvanlo chun, kipumkhatna hi leibel kek vak gual a batna a um hi. Corinth kochuamte apat i mu gual in thilpiak lamdang mhip thei tak nasa leh dangdai deu tak ah nasep ngaisan takluat a bailam hi. Paul in thagau thilpiak kawisan dan di leh thildan ding korinth mite a zilti a, a chang in thagau chun thawmngai tak a nei ah a chang in nem takin a siam kit ah. Midangte chan dan hiat leh pawm theilo na leh thagau thilpiak pumpel guat na hin kipumkhatna a dal sek hi. Ki gensiatna himhim hi

kipumkhatna leh nasep khaw-pna pha suksiatna di'n setan in matchak phatak in ahung mang sek a, zia gual ma chun ei ma mu leh chan dan gual ah midangte pui guatna hi pawlpi a ding ah thilpha pen ahi puai.

4. Thagau thiangtho chu zalensaktu ahi:

Paula'n Galatia mite kiana khrista ah zalenna i chan thu uh aha gen hi. Gal 5:1-13 thagau chun nasem dingin zalenna ei pia ta'n, a suak hinna apat ei puidawk ta ahi. 2Cor 3:17 Lalpa thagau umna taphawt ah zalenna a um sek hi, ti mu ahi. Zia hi bang gual zalenna ahi diam? Gingtute'n bang gual ah mang di i hi uh em ti hi thil pawimaw tak ahi. Zalenna ti hi thil haksa leh mantam tak ahi. I mawpuaknau hia zing kawm ah mat a ngai hi. Thagau thiangtho in gingu lungthim kihawngtak chung ah na a sep chun limna kipakna a um sek a mite lungthim leh ngaituana a zang ah, vangam tep lawkna ngai thei ahi. Mimal zalenna mai hilo in mipi a ding ah i kihiat a ngai hi. Zalenna hin midang hinna a suk buailo ah midangte lawkna ding a ngai-

tua sek hi. Mihingte hin, i dawi gual ah i um thei uhi zalenna's i ngaisek un, a diak in, khanglaite'n zalenna i hiat uhi chu suak ah lutna ahi nuam sek hi. Zalenna hi mani kithununna a ding ah zalenna hilo in, hepi-na nasepna ding ah zalenna thagau ei piak ahi zaw'i.

5. Thagau thiangtho leh Pathian thu

A kisamkai dan tawmcha'n genlang hitiu. Pathian lungthim, thiltup leh lemguatte mihing in a hiat ah, a lopi thei na'n thagau thiangtho in zawlneite leh midang dang mangin a hung gendawk sek hi. Ezk 12:1,8,12,21,26 & 2Thes 3:16.

William Tyndalle chun Pathian thu chu thagau ahi in, a thu zosia hile thagau a hi. I Bible in a dawidan hiachian lo ah thagau in ei gennawp i hiat-thei diam uh? A piatu'n a piak sang ah hiatchianna thukzaw neisak Guatemala hamham hi thil diklo ahi. Thagau chu hinna piatu a hi'n Pathian thu hi a hing ah, thil ahi thei hi. Heb. 4:12, ziaziakachun, Pathian thu leh thagau thu hi khendan thei ahi puai.

6. Thagau ah dimlet thagau

ah Baptisma:

Thagau Baptisma ti thu thuthungthak in amat dan a chun, min Khrista ah hinna a zawp ah, pianthakna a chan chu ahi. Acts 1:5, Rom 6:3,9, 1Cor 13:13, Acts 2:38 Thagau Baptisma hi channawn thei ahi puai, thagau Baptisma leh thilpiak hi pakhat ahi'n, thagau ah dimzing ti hi vang a um thei hi. Gingtu masate kam-suak apat thagau a dim nau hi tamtak mu ahi. Acts 2:4,4:8, 6:3, 7:55, 11:24, i et leh thagau ah dimzing ding ah thilpiak i hiu, Eph. 5:18 a apau matdan i et chun, chanzel ngaidan mu ahi. Thagau ah Baptized sate hi thagau ah dimzel sek di ahiu. A chang leh zukham tawh tekhin thei ahi dan le mu in a um ah, a lim un thil thak sep anuam ui. Eph. 5:18-21 lim tak ah thu leh laa ah kipawl lim nawp-nate, kipakthu gen nawpnate ki ngainiam theina lungthim leh migilote panglo ah khawsa thei mite ahi di ahi(Acts2).

7. Thagau thilpiak leh thagau gaa te:

Paula'n thagau thilpiak hi vel tamtak a genlang ahi. Rom 12:1-8, 1Cor 12:8-30, Eph

4:11 ah a mu ahi. Zia thilpiak hi gingtute hatna ding leh sukpi-tin na ding leh ama hia nailote Lalpa huang ah puina ding ah matchak thei ding ah piak ah i hiu. Thagau thilpiak hi matkhial thei ahi. Khenkhatte thugen theinate, suk damtheinate, Pau hiatlo ah pautheinate leh a chuamchuam piak i hiu ah, amabo, masialna ziak ah matkhial thei ahi dan hiatchetlo ziak ah gasualo um thei ahi dan hiat a dawu um hi. 1Cor 12:13-14, Paula'n thagau ga chi kua ei gen ah zia cheng lak ahin khat-bep nei guat di hilo in a leng ah nei guat hi gingtute pitinna ahi.

Zia a chung thagau ga chi tamtak ei gen masangin tisa ah nasep phalote ei gen masa ahi. Ziaziaakachun, khristian khualzin leh khrista sepbak sem ding ah guat leh sawl i hi ziak un, taksa dan leh thagau dan khen thiam ah thagau thi-angtho mapuina zal ah, i sep diteu sem mualsua dingin Lalpa thagau in ei pui zing ta hen.

.....xXx.....

Thagau ah dim in um un'

(Eph 5:18 b)

~Rev. Liante Phaltual
Moderator, RCG.

Thagau a dim hi Khristian zosia a ding ah thil pawimaw pen khat chu ahi. Kochuam hing bep hilo a, Kochuam khangto leh damthei hina ding ah chun Thagau ah dim chiat a ngai hi.

“Thagau ah dim in um in” ti hi khatvei thilsuak ahi puai. Taksa ah pian hi khatvei thilsuak ahia, Thagau ah pian ahilo leh pianthak hile khatvei thilsuak ahi. Chuleh, tui ah baptismachan hi khatvei ahia, ThagauThiangtho ah Baptisma chan hile khat ahi. Amabochu, Thagau ah piangthak leh ThagauThiangtho ah baptisma changtate chuThagau ah baptisma changtate chu Thagau ah a dim zing diu a ngai hi.

Ephesa 5:18 na hi hun chiasa ah zik hilo in, tuhun genna ah zik ahi. Apostle-te leh gingu masate kha le Pentecost ni'n ThagauThiangtho in a hung dim pan ua maleh zia chu a ngansia puau a, Thagau Thiangtho in a dim jel ui ti Nasepte lekhabu ah hi kichiantak in I mu thei uh ahi. (Nasepte 2:4,4:8,31;9:17,13:9 en in).

Tuni Kochuam lawiupa khenkhatzu dawnte hi bang ziak ahi diam I tichun Thagau ah dim lo ziak uh ahi.

Apostle Paul in chu zukham tawh Thagau ah dim hi a kilang (Opposite) in a gen hi. **“Chun uain(Zu) kham in um ki un, zia ah chun kisumlona a um sek hi; zia sang ah chun Thagau ah dim in um un”** (Ephesa 5:18) ti ahi. A diktakin, a changleh zukham, a chang leh Thagau ah dim tichu thilhitheilo ahi. Khristian kiti ngal ah zu dawn chingte hi a pianthak lo ziak uh ahi. Piangthaklote chu Thagau in a dim thei lo ding uh ahi.

Kua hem khat in la ki-

ang in, **“Milungsiat ah um in”** ti’n thu hunpia hen la, maleh nang hun lungsiat di mi kuama um lo hitaleh bang ti’n zia thupiak chu la zawm thei diam? Chun, Thagau ah ei hi dim thei kuama umlo hitaleh bangti’n Thagau in I dim thei diam? Paul in, **“Thagau ah nangmau ngei ki hi dim un”** a tipua, **“Thagau ah dim in um un”** a tizaw ahi.

Thagau ah dim hi Pathian nasep ahia; mihing nasep ahi puai. Himaleh mihiamte’n Thagau channawpna I nei masak uh a kul hi. Mite lungsiat ah um I nawp ahi chun, mite lungsiat thei ding ah I um masak a ngai hi. Ziagual ma chun, Thagau ah I dim theina ding ah chun Pathian dawigual hawl a, hi masak a ngai hi.

Etsakna’n: Belkhat sung ah thil dang dim sa ahi chun, zia bel sung ah chun tuisuk dim thei hi puan tin, chun, bel sit kihawng lo ah chun tuithal dim thei hi diak pua’n a. Ziaziakchun, PathianThagau ah la dim theina ding ah chun kisku-kawng masak a ngai hi. A um-zia chu, lunghei ah gitlo haisan

a, la kisuk thiangtho masak an-gai hi. Chuleh, kihawanna tichu ThagauThiangtho thatngaina, dawina leh kingaitawmtak ah Thagau Thiangtho Dawt masak a ngai hi.

“Thagau ah dim in um un” Ti hiThupiak ahi. I nawp leh dim ding, I nawp lo leh dim lo ding ti’a ei ma dawitel ding hilo in, a kulziak ah gintu mitin, Thagau ah I dim chiatdiu tina ahi.

Pathian in a Thagau ah I dim chiatthei ding in a thu eimalzawlpiaak ta hen. Amen.

.....xXx.....

Lal (Pathian) Gam

Nasemte leh pension hun ah diktatna

~Rev. Hangpi Manlun
Moderator, Zou Synod

Thumapui:

Awle tuchung in diktatna thu gen ding tamtak umlak ah Lalgam nasepna/pension hun a diktatna thu gen ding I hiu. Chuleh a nuai ah thu kigente hin kuama mimal leh pawlpi kaw-kna leh genna ahi pua, atangpi'n I gam pumpi et ah kigen ti ka gen lang masa nuam ahi.

Khawvel khanto tawh kituak in Government lam hileh, Mission lam a nasemtute adiak in kumlam ah upa lamte ading in sepna kipat chawldam hun (pension) hun ahung hitai. Zia umzia chu ahileh khang hung kisangto jel in hun thaka I lut tau tina ahi. Chuleh, nisin phial in Tv, local channel leh news paperte a pat inle pension kitha muding leh hiatding a tam ma ma tai. I gam ah Mission nasemte, kua pawl hitaleh Pathian mapuina zalin kum zakhat phial bang I hung hitau. Tichun nasem masate a ding pension hun a hung hi pan panta, tuban kum 10 zaw vel le a kimkhat phial bang ki pension ta dingin ahi. Ziakachun, I piankum thu'u ah diktakna pawimawna gen ding I hiu.

1. Paulap tinglo kipaulapte ahileh, ka pian kum diktak ka hepuai ti ahi.

Achung ah paulap khu tulai kochuam sung ah semtu tampi buaina pen ahitai. Aziak ahileh, semtu khenkhatte in apian kum diktak jiklo a, diklo jik in nasep gua ki um thei

ah. Etsakna ding in, kochuam khenkhat ah a semtuteu pension na ding in chi ni in a khen ui. A sep hun sung kum sawmli (40) ahilo leh ama pian kum, zia chu a nu gilsung ah kipat zia leichung ah a piandawni apat sim in kum sawm guk leh nga (65) ating masa pen pen

chu a semtuteu pension hun ding in a bithiak u'i. Khenkhat in ahileh a semtuteu pension hun ding in apian kum, kum sawm guk or sawm guk-le-nga at phat ua le pension piak ding ti in dan-le-dun anei uh ahi. Zia kipat ahin tena van mat ahileh, mani pian kum diktak tina ahimai hi, a dang ahuap kha puai.

Ahin, ziagual hi ahilai-in, mi khen khatte'n thudik kim khat paulapin, kapian kum diktak ka puai or ka nu ka pan ala record lo ti'n a sep-nau pawlpi tilo gual in Class X, (Academy) apian kum pen pia un a mangmai ua, ziagual mite chu sawpipi sep gua ahi ti thu gen leh sak atam mama hi. Adiktakin inu/ipate'n pian kum diktak record ala nei-lo maleu ikanpei taktak leh ikhangualpitemu pian kum kipat in, ahiloleh kua hem khat thi kum, ahilo leh thil thupi khat tung kum leh nidang lai vang a inu/ipate'n zia mun kha I lothaw kum ah piang la hi ti ale hiatthei ahi. Ziakachun, itup taktak a ikanpei po

leh ipian ni-leh-tha diktakpen helo leuhin le ikigualpi khat pian kum tawh hisap/etin ipian kum pen chu suidawthei mama ahi. Ziaguala piankum helote chu Melkizedek gual ah pianna, mawmna neilo tina hiding ahi.

2. Pian kum ni kinei ahi.

I gensa gual in pawlpi'n pension diktak dinga ei pawmpiak a tangpi in inu gilsung apat leichung ah ipianni sim in or isep kum uh ating masa penpen ahi. Ahin khenkhaten Matric (Pawl sawm) i pass kum a kipia, zia chu igensa gual un ipian kum diktak uh tawh kituaklo tampi um ding ahi. Khenkhatte ngel chu a pian kum diktak leh a pawlsawm pass kum pen kum 5 or kum 10 bang in a kikhezo ahi. Ziakachun, ipension na ding in ipian kum diktakma imatlo ua ahileh adiklo tina ahimai hi. Ahin Government record ading in vang i Class X (Academy) kum pen uh jik leuhin le khawklo maithei ahi. Aziah ahileh i pawlsawm certificate chu i record khat ahi jiaq ahi.

Ziagual ah chu thudik hena sasa a helo ah um mai chu sualna leh du-amna chikhat ahi. Ei Lalgam nasemte adia ibawl ding chi hilo maithei ahi. Chuleh, i pawlpi leh lamkaite ithemzo maithei a, ahin mini ithepzawlo ding aum a, ziate chu Pathian leh eimai kithem theilo ahi. Aziak ahileh isiale-pha hetna'n ei awimaw tho ding hi.

Chun, Unau Mizoram Presbyterian Church Synod, Senior Executive Secretary lui khat in apian kum diktak a baptisma channa record anung mukit jiajin Sr. Executive Secretary a term beina ding kumni maimai in a vatlai in, ama-leh-ama kipuangdawk in, aterm sem zawmlo in a pensionta mai hi. Min ziaguala chun diktatna panpi ngam in ahina uh le haisan ngam ahiau hi. Et-tawn tak mama hi. Ei uh lak a le ziagual mi chu bangzat ium diam ti ngaitua kham ating hi.

3. Pension ding kum Mission gentaklo government inle abuaipi mama ahi.

India gam ngei in le,

ihetsa gual un, India Army staff khat apian kum thu ah ginlel akai ziaak in India gam pum-pi akilingzo hial hi. Pian kum diklo chu India gam Government nasemte lak in le buaina khat ahi. Ataktakin Mizoram lak ngel ah ziagual ah diklo dinga gingchakte chu koch-uam record bu a en mai sek u'i. Chuleh, khenkhatte diklo tak, kum semvalta kinung hetdawte bang chu a pension zaw ah alaw lakin a nung ditsak mai kit u'i. Ziabep chu hilo in pian kum hi nil eh thum bang nei-thei ahia, ahinla eima la khat bep ihingal in. Ziaka-chun, a diktak gen ngam mai chu thudik khat ahi.

4. Mel-leh-kum kituaklo.

Banggual in kinaupang sak nuam lehin uh le khenkhatte chu a mel-leh-kum kituak thelo ahi. Chun, ei sang naupangzaw, isang ni sang thumnate a diktat taka a pension nung ua, ei un zuau igen zik ua diklo taka sepsep khak ding le thil lau um leh zach-at um takmai asuak hi. Taksa ei sang a naupangzawte sanga

naupangzaw ah um mai ding chu izuau thei dan uh leh isum dudan uh suklatna hawitak mai ahi.

5. Nengkukna tawpkhawkna ahi dan ngaitua hitiu aw.

Etsakna ding in kum khat sung in semtute'n tha-sawm leh ni law (12 months pay) pawlpi'n ahungpia, kua ahem khat chun tha sawm-leh-thumn law ala kilak maita leh, hetdaw ahi hun ah chun ki-terminate mai ding ahi. Ahileh, i taksa kum sawm 60 or 65- i tin nunga, zuau igen ziak in kum 5 bang zuau leh nal ah i kinaupangzak ziak in Pathian sum I nekmai chun nuam taulin lenglo ding ihin, itu leh chate khang ah inekgukna pap hung puakzak ding ahi. Ziagual lawmlawm ah chun ipension hun tiang tiang in tawmngai kisa'n vaguk sepsep mai chu Peter in Jesu akimat lai taka panpi kisa atemsau tawh amante khat bil asat thak piak a, Jesu'n apachat keilo din mun ah dinna ahikhak ding alau um mama ahi.

Ziagual ah umte chun

mihing them hilo in Pathian them ahin un, kuama'n la Pathian kithemzolo ding ahingal a. Bible in, sum ngainat takluat chu soal tin bul atingl a, zia-kachun, sum ngainatna chu soal chikhat ahi ti ihet ding uh ahi. Ziakachun, Pathiaan kiang ah damtaka I kumtin tiang uh semthei ding in pauchap in diktatna tawh nasem leuhin Pathian malzawlana lam chuam chuam in dawng maw ding ihu em! Lalpa'n simtute ei malzawl zingta hen.

.....xXx.....

SUNDAY SCHOOL NAUPANGTE PSYCHOLOGY

~Rev. D. Robert Thanga

Thumapui:

Psychology kiti hi Grik paukam pani 'Psyche' ti leh 'Logo' ti apat lak khawm a hi. Psyche ti chu 'Lungthim' tina ahia, Logos ti chu 'chanchin' tina ahi. Ziaziakachun, Psychology ti chu lungthim lam zilna a hi. Mihing mizia leh lungthim putdan zilna hi psychology ti ahi pen hi. A hinla, mizia leh lungthim putdan siamtu, a kiselgu pen hi ziltei a ngai hi. Ziagual ahin: (1) Kisuan sawn ziak in, (2) I kim vela thil aum ziak in, (3) Taksa khangto zel in i mizia leh lungthim putdan le aki theng theizel hi.

Sunday School ah hin le a chung a pathumte hi a kizil khawm vek sek hi. Taksa a hung khanto dung zui in, i mizia le ahung danglamto zel hi. Zillai bu le, zia taw kituak a siam ahi. Pawl khen dan hi le psychology taw kituak a siam ahi. Ziaziak chun, zillai le, amau mizia leh taksa taw kituak ah guangal ahi.

BEGINNER PAWL(KUM 4-5)

Zia gual hi ahi...

1). Naupang kum li a hung tin pat uh hin, ataksau leh alungthim uh chu athunun thiam nai puau ua. Aneulai ua kipatin, amit uh aha sung ua, taksa kisawizawi apawimaw ziak ua atawi zing dinguh ahi. Zia chu ahi ziak in Sunday School ah hinle tawilo in a um thei puau hi. Zia hi (ataksa un) a pawimaw ziakin pawng khap chak

tinten thei chi ahi puai. A tawidan ding uh amau lemchang dan thiam tak a siampiak ding hi pawimaw zaw ahi. Hiatding a pawimaw te... Khutban zak hunte, dinsak hunte leh khut bet hun te hi ngaitua piak apha ma ma hi.

2). Paukam thumal ahe tawm nalai ua, a ngaituanau le a chawm hi. Thil um zia le aman zung zung thiam tadi puau hi. Zia ziak chun, paukam amawl thei pen ah mat ding ahia. Bil

ah hiatna mai ah a navak zaw seklo zia kun khawi khel khel leh mu khel khel bang a nuam sek ui. Zia haw chu a umkhel zia mai uh ahi puai. Hiatbe leh zilbe anawp zia uh ahi zawi. Dawtna tamtak adawng un, a thudu ma ma sek ui. A hiatnau khangto zel tina ahi. Hiatding a pawimaw... Zilsaktu ten a ngaithei zawng ua leh a diktak ah dawn hu pei akul takzet a hi.

3). A thil zil uh tamtak hi tak-sa tawh zildaw agaw sek ua, alim ah (action) tawh nuam asau ahi. A zillai khêl ua le I hindan/ umchan tiangun a zil nasa ma mau a, I mulo kal bangun ihi dan ala thaw/ching in abu ai thei ma ma ui. Hiatding a pawimaw...zilsaktun chu umchan ah te uluk/titak angai a, paukam le uluk/titak ngai ma ma ahi. Suangtuana khovel ah cheng nasa thei ma mau a, athil ngaithak lai uh hi mitthan a suangtua ngal mai sek ui. Hiatding a pawimaw... zilsaktun, tuanthu igen lai un mitthan muthei ngei ding in (action) tawidan tawh gen an-

gai sek hi. Chuti ahi lai in, angaitua zui thei hun sung uhi minute 3 apat a minute 7 vel hi ahi. Ngainawp asak u chun tawilo in angai thei ui. Zia zia kun, hun sawt tak tak thil gen sawt ah le aphachuam tak tak diak lo a hi.

4). Aneu lai ua mi zosian nausen lawp ah ala lawp sek uh ahi zia kun Beginner ahi tiang un le lawp nuam angai nai sek ui, ngaisak(attention piak) angai ma ma sek ui. Hiatding a pawimaw...zilsaktun angaisakpen gual ah thiam tak ah alatsak (show) ding ahi.

5). Biginner zilsaktu ding ah hin, “NU”, naupang mizia leh lungthim hia leh akipezo deu, dawthei taka naupang enkawl thiam guat thei hi leh duthusam ahi.

PRIMARY PAWL (KUM 6-8):

1). Primary pawl a hin kum 6-8 um ding ah ti ahia. Beginner sanga tamlo cha lian deu ahia. A neu chau apata a miziau pakhat a ipmutlo ua leh tawi zing sek a hui kha a

kilang zing ahi. A hethiamlo tute a ding in ningtel um ti mai ding ahiu. A mavang, Pathian in a siam dan a hung piting zel theina ding ua, a taksa suk tawi zing a pawimaw mama ahi.

2). A ngaitua nau hal (active) hun sung hih minute 7 vel a hia, zia sanga sawt ahi chun, a taksau pian dan un, a zo talo uh ahi. A khut leh kengteu a tawi zing a ngai a, a ngaituanau le a lengkual vel zungzung sek ahi. Thil a hezing thei bek puau a, himaleh a tawp a amu taphawt uh chu, a lungthim uh luatu in a pang zaw sek hi. Hiatding a pawimaw...zilsaktu in, pawl/class ilak phat leh sawttak hun matlo a pha ahi.

3). Thil zil be zel hi a ut mamau a, a hiatnau hih a gilkial ngawi ngawi sek uh ahi. Ziaziak chun, Pathianni, nisin ahilo leh a chang chang leh tuanthu thak a hiatbe nuam tenten sek ui.

4). A thatnawp theina ding un, gai sang in pakchat zel sek di ahi. Thumanglo ahi chun, "A fel ahi ama hih, thumang ta ding ahi," tia I gen piak chun,

phatakchan a hung um mai zaw sek hi. Amau lamah pang guala ei muthei na ding ua, enle a lunguh hawl zing angai a, ti gual chu a dawu dan u le ahi. Zilsaktu chu ziagual ding a chun I kisingsak zing uh a ngai hi.

5). Sunday school bep hilo in, khawlai ah le I mu chun ho hamham guat ding ahiu. Du-attak leh hepina mel tawh i etkawl khel a, lul hih amau a din a um taktak diak lo ahi.

JUNIOR PAWL (KUM 9-11):

1. Sunday school Naupang hih Department chuam chuam hin, hindan a nei chuam chilchel u'n, Beginner leh Primary te hih a hindan uh a kibang deu in, Juniorte hih a chuam kei kit hi. Intermediate leh Senior hih a kibang kit deu in. Juniorte chu naupang ahi ta puau in, fel tak leh etkawl nuam tak a hui hi.

2). A taksau hin, a lungthim uh sau tak mai a, thunun ahi ziak un, Junior naupangte hih taksa kiphu tawk, kithazaw tak mai

ahi ziaku'n a kiningtel vak ma ma ziang uh ahi. Taksa lam-pang ale, a hung khanlet tak dungzui un, a gu kisuktuanau haw le a hung dik tak ziak in, a thau le a hungza thei ma ma tau a hi. Ziak ah hin, bang hem khat vak bawl a nuam u'n, zia ziak ah chun inlam leh Sunday School mun ah le bang hem a hi dingu kawi piak a pawimaw ma ma hi.

3). A ngaituanau lam ule a khang hat ma ma ua. Vak kigel kawm a thuanthu phuak kawm mai maite hin a lungthim ngaituanateu a chawm zo ta pua'n, a tak tak a um ngei a hi nai ti hiat theina lam hih a nawp lam uh a hung hi zaw ta'i. Hiatding a pawimaw... zilsaktu in, Bible ah mite chanchin I gen in le, a hithei tiang ah chun a umna bu, bung leh changte gen lat kawm zel sek kha thil pha a hi.

4). Mi dangte ki-elpi na (competitive) lungthim a pulian ma ma zingu'n, phak zaw lo nei hin, haksa asa ma ma sek u'i.

5. Khawlai lam ah a hinkhu-au ah chun, lawi pawl a thiam tak ziaku'n kipawlpi chuam,

nei nuam a sau ah. Numei in a numei kibatpi, Pawsal in a pawsal kibatpite a kivawppi sekuh a hi. Ziak ah chun, tian khat (line khat) ah numei leh pawsal chutkhawm saklo ding a hi; ginchak sang in haksa a lah sa ten seku a hi.

INTERMEDIATE PAWL (KUM 12-14):

1). A taksa hung khang in a hat mamau a, kumsin a pian dan ule a hung danga, a puan-ak teu le a ak sawt theilo uh ahi. Zia taksa khang hin a lungthim u le a sukha, lungthim det bek buk leh thil hi chet chawt lam hi a ngaitua bek puau hi. Zia sang chun thilthak lam leh lemlep lam a ngaitua zawu ahi. Zia pen hi upa zawte hawn a hiatthiam pi lo khawvela cheng guala kingaituana siamtu chu ahi. Upa zawte hi khing (thing) leh thil helo mama dingin a kawi ua. Zia zaw a chun a zilsaktute gina beklo a a hiatteu musit ngal le a ching u ahi. Zia ziak ahin zilsaktu te hawn I hinnau leh tawi leh chan dan a chitthei (uluk) a ngai diak

mama ahi.

2). Naupang gual mai a kital mai chi hitalo a, a kihiat ua pat in hinna ngakna mun det a ngaitua nasau ahi. Ettawn di mi a guk chan a hawl sek u ahi. Hiatding a pawimaw... A zilsaktuteu ngei hi a ngaitua masak u ahi pen sek a; mi dik leh gin-um, sakhaw lam hin dan tiangale ettawn tak hi a ngaituau a, zilsaktute'n taka etsakna hinkhua latsak hile daw i a um pem hi.

3). Zia gual hun apat hin sakhaw hinna lam a ngaitua pan ua, a tak in a sulang ngam ziang puau a; maleh a lungthim sung ua chun dangchakna a nei lian mamau hi. A thei dan tiang tiang un thinung hun leh thil taktak hi a het ut un a ngaitua nasa mamau a. A titlonau leh gilo ahiu a hechian mamau a, ki-uansak a chin khawlaw zing sek ua, hukdawktu a pawimaw hun laitak uh ahi. Ziaziak hin a zillai ua le hukdamna thu a tam a. Zia a zillai teu hi hiatna hipungtu bep hi ziang lo in, a hinnau ah a takamat ding ua siam ahi.

SENIOR PAWL (KUM 15-17):

1). Senior pawl a hin kum 15-17 mite kaw i ding a h i u. Taksa lam leh lungthim lamah piting lama manaw zinglai uh leh thil ngaitua tua zing pei mi ahi lai uh ahi z i a k un, hiatna lamin a dangchak ma mau a. A zillai teu hawle ngaitha peilo leh ngaisaklo gual tak in um ziang leu le a guk takin a ngaitua pha ma ma tho u'i. A zillaiteu hawle a gen ah gen thaw zianglo in a mau ngeile gen sak sek a, angaitua zui ding uh guan piak zel a pha 'i.

2). A mau taksa leh a kicheina teu chu a buai piu a zia thilte hin a lungthim teu hawle a kai mang nasa ma ma ziang a hi, z i a k chun, taksa kisuk thi-angtho leh kicheina chungchhang zilsak nasat ding a hi.

3). Thil thak vak kimaituapi leh vak bawl patep hi a thanuam ua, chingthei taka etkawl a ngai ma mau a hi. Zia hun lai ah a chin zawngsak teu hi a hun khanletpi ding uh ahi z i a k in a hindan uh hung chia zel dinga thil pawimawte haw

chu hiatsak zing chu thilpha a hi.

4).Senior pawl zilsaktu chu a pawlte hinkhua a kipat ah kizilto zel kawma kisingsak ah ngai a. A pawl te'n a chung a taksanna a neilo ua ahi chun a ziltalna chun ahi ding tiang ahi phaklo khawlaw thei khawp mai a hi. Hiating a pawimaw... zilsaktu ding a hin a thei ham ahinchun teilawlte kaikhuai thei tak leh a tuk lo gual ua a ngai uh hithei ham leh a pha a hi. A pawimaw pen chu ki piak zaw-

na tak tak tawh Pathian nasepna chu ah la laksawn ah nuam a, zia gual mite chu a thu leh la teu chu ngai saklo theilo ahi sek a hi.

.....xXx.....

PHUNGVUKTU KIBELAP

Upa Thangpu Changsan, *Encouraging Member ah ei hung panpiak ziakin a chung in kipak thu i gen ui.*

Pauchapna'n deljui jel hitiu:

**2nd DISTRICT TIN
NAUPANG SUNDAY SCHOOL UNION
KHAWMPI-2019
Ahun: 22nd-23rd June 2019**

Zia Khawmpi ah hin Naupangte'n Pathian thu ah kibulphuna det tak leh hawi tak a nei theina ding un kochuamte'n pauchapna'n deljui jel hitiu.

Pauchapna'n deljui jel hitiu:

**DISTRICT TIN
REVIVAL TOUR PROGRAMME-2019.
THUPI: TUNG DING THAK KIT HITIU
(Neh.2:17)**

SPEAKER: EVAN. THANGNEU

Amun: SADAR DISTRICT

Ahun: 2nd May-5th May 2019

Amun: KHUGA DISTRICT

Ahun: 9th May-12th May 2019

Amun: TOWN DISTRICT

Ahun: 23rd May-26th May 2019

Amun: TUITHANAK DISTRICT

Ahun: 30th May-2nd June 2019

Kochuamte'n Thagau lam ah malsawmna tam tak i dawn chiat theina ding un pauchapna'n heing hitiu.

KSP DIARY:

1. KANGPOKPI BIAKIN HAWNNA:

Kum tak tam Kangpokpi ah kochuamte'n Biakin thak nei dinga duthusam a neijing uh chu Pathian malzawlna zalin Leilon Kochuam in sum leh pai itchak neilo in avasak daw piak tau. Ahawanna Dt. 24th April 2019(Pathianni) chun nei ahi tai.

2. SUNDAY SCHOOL TEACHERS' TRAINING NEI AHI:

Dt. 15th April 2019 ni'n NSSU & PITING Sunday School Teachers' training chu Head Quarters Church, Tuibong ah nei ahin NSSU lam ah pat in hotu 58 a hung pangthei un, Piting lam in hotu 20 ahung pangthei ui.

3. HEADQUARTERS MUN DING CHAWK AHITAI:

KSP Head Quarters mun ding chu Pathian malzawlna zal in Torbung Bangla kiang in 4.5 acre chu chawkdaw ahitai. Amun leh gamte chu sukthiang ahitan, maban ah zia mun ah hin Head Office chawnlut hiding ahi. Kochuamte lunggel hi Pathian in ei malzawljel theina dingin pauchapna'n Pathian kiangin dawnjel hitiu.

4. M.Th ZOTHAK:

Rev. Lienthienmang S/o Upa Lamkhodal of Gangpimual in chu M.Th chu ATC, Aizawl ah pat in a hungjo ta, Pathian kiangin kipak thu gen hitiu. Taksa leh thagau lam ah kochuamte puitu hawi ahijel theina ding in i pauchapnau inle hejel hitiu. Ama hi tuhin Shillong kochuam enkawl dinga chia kit ngal ding ahi.

5. MISSION FIELD THAK:

Lalpa'n gamthim gam ah chanchinpha genjel theina ding in mun ei piak be jel hi. **Sekmai khunou leh Phayeng** mun ahin chanchinpha tangkopi theita dinga mun eipiakbe tai. Pathian kiangin kipak thu gen hitiu. Biakin kikhawpna ding nei lemchang nailo maleu, In lemchangna mun mun in kikhawpna a neisek ui. Tuhin zia mun ahin kochuamte enkawl dingin Evan. Kh Chaoba Singh kawi ahin pauchapna'n deljui jel hitiu.

'DAMNA AW' PHUNGVUKTUTE :

PATRON MEMBERS :

1. Pu P.Vaiphei IAS, Imphal
2. Upa Henthianthang, S.Kotlian
3. T.Upa Haulallawm S.Kotlian
4. Upa Laltinkhup, HQ. Church, Tuibuang
5. Pi Manliankim, HQ. Church, Tuibuang
6. Nk. Lalsangpui, S.Kotlian
7. Upa D. Mina, Lingsiphai
8. T.Upa Ph. Gena, Lingsiphai
9. Pu. Khamlal Saipum
10. Pu Khamliankap Saipum
11. Pu. S.Kapbawi New Delhi
12. Upa Genhau Central Church, Compound veng

MEMORIAL GIFT :

1. Pi Deem Melody, **Central Church, (Rengkai)**
[in loving memory of (L) Upa Lamthianlal]
2. Pi Rebekah **Kangvai**
[In loving memory of (L) Pastor Khaivung]
3. Upa Liansomthang **Lingsiphai**
[In loving memory of (L) Pu. Henzagen]
4. Pi. Nem Grace Boisi Capvung **Delhi**
[In loving memory of (L) Pi Vanlalchhuangi]

SUPPORTING MEMBERS :

1. Upa Khomlunlal S.Kotlian,
2. Pu. S.Thangminlian Lingsiphai,
3. Pu Lelboi, Lingsiphai
4. T.Upa Lalneilian Central Church,
5. Pu EL Soson Central Church
6. T.Upa Genminthang, Central Church,
7. Pi Kimneihawi Saipum
8. T.Upa J. Mark Saipum
9. Pu Genthiankap, Nghathal
10. Pu Lianzakhup Nghathal.
11. Pu Lemthang L.Mission Veng
12. Rev. S.T.Kaia Vaiphei Nghathal

ENCOURAGERS :

1. Pu P. Kamneilian, Lingsiphai
2. Evan Thianlam Lingsiphai

3. Pastor Kaiminlian,	L. Saronphai
4. Upa K.Thanga,	Kangvai
5. T.Upa Manglem,	Kangvai
6. Upa S.Bela Capvung,	Kangvai
7. T.Upa David,	HQ Church, Tuibuang
8. T.Upa Khupneu,	HQ Church, Tuibuang
8. T.Upa Zamthamuan	HQ Church. Tuibuang
10. Pu Lamthianlun,	Central Church, Compound Veng,
11. Pu Vendam,	Central Church, Compound Veng,
12. Pu Haudal,	Nghathal
13. Pu Khamliankhual,	Nghathal
14. Pi Mary Vaiphei,	Nghahal
15. Upa Paukholam	Nghathal
16. Pu Tongzahem	Nghathal
17. Pi. Nunmawi	Nghathal
18. Pu Kaikham	Saipum
19. Pu Pauthianlal @ Mengpu,	Saipum
20. Upa Ginneithang,	Saipum
21. Pu Donggen	Saipum
22. T.Upa. Lallawmthang	Saipum
23. Pu.Damthang	Saipum
24. Upa Kaijuanthang	Tangmual
25. Rev. Haulalven	Tangmual
26. Pu Gomang	Tangmual
27. Pu Kamneilal	Tangmual
28. Pu Kaisawmlal	Tangmual
29. Pu Thangneilun	Tangmual
30. Pi Niangphal	Bisanmual
31. Upa Thangpu Changsan	Leimakhong

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazel i hiu a, kuale phungvukna bawl utte a ding in bangtik lai in le bawlthei zing ahi.

- (i). Patron member- Kum 3 (three) a ding in ₹. 3,000/-
(ii). Supporting member- Kum 1(one) a ding in ₹. 2,000/-
(iii). Memorial Gift- Kum 1(one) a ding in ₹. 2,000/-
(iv). Encourager- Kum 1(one) a ding in ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, ccpur

CIF nos: 86412486695